

Na osnovu člana 4. stav 9. i člana 5. stav 3. Zakona o ublažavanju negativnih ekonomskih posljedica ("Službene novine Federacije BiH", broj 28/20), Porezna uprava Federacije Bosne i Hercegovine donosi

Uputstvo o načinu podnošenja zahtjeva i o potrebnoj dokumentaciji za subvencioniranje doprinosa

Ovim uputstvom propisuje se način podnošenja zahtjeva i potrebna dokumentacija za ostvarivanje prava na subvencioniranje doprinosa propisanih Zakonom o ublažavanju negativnih ekonomskih posljedica (u daljem tekstu: Zakon).

Prema odredbama člana 2. i člana 4. Zakona, pravo na subvencioniranje doprinosa imaju porezni obveznici koji ispunjavaju sljedeća dva uslova, i to:

1. da su izmirili obaveze za doprinose i porez na dohodak uz isplaćene plaće zaključno sa februarom 2020. godine, i
2. da imaju pad ostvarenog prometa 20% i više u mjesecu za koji podnose zahtjev u 2020. godini u odnosu na ostvareni promet u istom mjesecu 2019. godine.

Ostvareni promet poslovnog subjekta utvrđuje se na osnovu podataka o evidentiranom prometu putem fiskalnih sistema na serveru Porezne uprave.

Ako poslovni subjekt nije obveznik fiskalizacije pad prihoda se utvrđuje na osnovu ostvarenog prihoda iskazanog u poslovnim knjigama. U ovom slučaju obveznik pravno lice je dužno uz zahtjev za subvenciju priložiti i svojim pečatom ovjerene finansijske kartice prihoda, a obveznik samostalni poduzetnik svojim pečatom ovjerene kopirane stranice knjige prihoda, i to samo za uporedne mjesece za koje se traži subvencija.

Za utvrđivanje pada prometa/prihoda za obveznike koji su registrovani nakon aprila 2019. godine, uzima se prosjek prometa/prihoda ostvarenog u 2019. godini ili prosjek prometa/prihoda za prva dva mjeseca 2020. godine (za obveznike registrovane u 2020. godini).

Pravo na subvenciju nemaju javna preduzeća, banke i druge finansijske organizacije, udruženja, javne institucije, organi uprave, organi i jedinice lokalne samouprave.

Pravo na subvenciju nemaju i obveznici uplate doprinosa koji su registrovani nakon 01.03.2020. godine.

Pravo na subvenciju imaju porezni obveznici sa sjedištem u Federaciji BiH i to samo za zaposlenike koji rade u Federaciji BiH. Poslovne jedinice privrednih subjekata čije je sjedište u Republici Srpskoj ili Brčko distriktu nemaju pravo na subvencioniranje doprinosa. Porezni obveznici nemaju pravo na subvenciju doprinosa za zaposlenike u poslovnim jedinicama u Republici Srpskoj i Brčko distriktu.

Pravo na subvencioniranje doprinosa obaveznih osiguranja ima obveznik uplate doprinosa, poslovni subjekt i samostalni poduzetnik, tako da podružnice (poslovne jedinice) pravnih lica ne mogu pojedinačno podnositi zahtjeve za subvencioniranje doprinosa (Obrazac ZSD). Naprijed navedena situacija može se desiti kod obveznika uplate doprinosa, npr. kada postoje dvije poslovne jedinice od kojih je jednoj zabranjen rad prema naredbama, a drugoj nije. U naprijed opisanoj situaciji zahtjev za subvencioniranje podnosi obveznik uplate doprinosa (na JIB

sjedišta), a uslovi za ostvarivanje prava na subvenciju prikazuju se na nivou društva za sve organizacione jedinice ukupno. Pored navedenog, postoji mogućnost da kod obveznika uplate doprinosa koji ima dvije poslovne jedinice, od kojih jedna evidentira promet putem fiskalnog uređaja, a druga nije fiskalizovana radi djelatnosti koju obavlja, podneseni zahtjev za subvencioniranje (na JIB sjedišta) će sadržavati ukupno ostvareni promet/prihod (promet evidentiran putem fiskalnog uređaja i prihod koji nije evidentiran putem fiskalnog uređaja) u periodu za koji se traži subvencija, kao i ukupan promet/prihod u istom mjesecu prethodne godine. U prilogu Obrasca ZSD obveznik će dostaviti karticu prihoda iz koje se može nedvosmisleno utvrditi iznos prihoda koji nije evidentiran putem fiskalnog uređaja.

Za samostalne poduzetnike i poslovne subjekte u niskoakumulativnim djelatnostima za koje su propisane osnovice manje od najniže bruto plaće, subvencioniranje doprinosa za april tekuće godine i svaki naredni mjesec, uključujući i obračun i plaćanje doprinosa i za mjesec nakon prestanka stanja nesreće, vrši se u visini iznosa doprinosa utvrđenih na propisane mjesečne osnovice za tekuću godinu.

Porezni obveznici koji ispunjavaju naprijed navedene uslove, zahtjev za subvencioniranje doprinosa podnose Poreznoj upravi Federacije BiH - nadležnoj poreznoj ispostavi prema svom sjedištu.

Zahtjev za subvenciju doprinosa se isključivo podnosi na Obrascu ZSD koji je sastavni dio ovog uputstva. Svi podaci u Obrazac ZSD se unose iz poslovnih knjiga i evidencija podnosioca zahtjeva i isti trebaju odgovarati stanju u poslovnim knjigama.

Sastavni dio ovog uputstva je i Uputstvo za popunjavanje Obrasca ZSD.

Zahtjev za subvencioniranje doprinosa – Obrazac ZSD i Uputstvo za popunjavanje Obrasca ZSD se nalazi na web stranici Porezne uprave Federacije BiH www.pufbih.ba u dijelu Obrasci.

Obrazac se podnosi u 2 (dva) primjerka, jedan za Poreznu upravu, a drugi za poreznog obveznika. Zahtjevi se mogu dostaviti putem:

- lične predaje,
- pošte,
- e-maila ili
- fax-a.

Ako se dostave putem e-maila ili fax-a obveznici su dužni u roku od 15 dana dostaviti originalni zahtjev sa priložima.

Uz zahtjev porezni obveznici podnose i dokaze o obračunu plaća - Obrasce MIP-1023 i specifikacije 2002/2002-A i to neovisno od toga da li su isplatili plaću za mjesec za koji se traži subvencija. Ako se traži subvencija npr. za mjesec april/2020. godine, uz zahtjev je potrebno dostaviti i propisane obrasce (MIP-1023, 2001, 2001-A, 2002, 2002-A). Ukoliko su ovi obrasci ranije podneseni ili se dostavljaju elektronskim putem (eksterni korisnici servisa nPIS aplikacije), dovoljno je podnijeti samo Obrazac ZSD, a u dijelu III polje 16. podnesenog Obrasca ZSD označiti kvadrate za obrasce (MIP-1023, 2001, 2001-A, 2002, 2002-A) koji će se predati elektronski.

Ako je obveznik uplate doprinosa uplatio doprinose za mjesec za koji će ostvariti subvenciju, iznos uplaćenih sredstava ima tretman poreznog kredita koji porezni obveznik može koristiti za izmirenje budućih poreznih obaveza ili podnijeti

zahtjev za povrat više uplaćenih sredstava od dana kada Federalno ministarstvo finansija - financija izvrši uplatu subvencioniranih doprinosa.

U daljem tekstu dat je primjer načina i obračuna subvencije obaveznih doprinosa u dva slučaja:

- Poreznom obvezniku se subvenciraju doprinosi (na teret obveznika - iz osnovice i na teret poslodavca - na osnovicu) na mjesečnu bruto plaću u iznosu od 590,00 KM.
- Ukoliko porezni obveznik obračuna zaposleniku bruto plaću veću od 590,00 KM, dužan je sa isplatom plaće da uplati razliku doprinosa na iznos bruto plaće koji je veći od 590,00 KM. Primjera radi, ukoliko porezni obveznik zaposleniku obračuna plaću od 1.000,00 KM, ovom obvezniku će se subvencionirati 244,85 KM (r.b.1). Porezni obveznik je dužan uplatiti razliku od 170,15 KM (r.b.3.), a kako je to prikazano u slijedećoj tabeli:

R.b.	Bruto plaća	Doprinosi na teret osiguranika				Doprinosi na teret poslodavca				Ukupni doprinosi
		PIO	ZDR	NEZ	Ukupno	PIO	ZDR	NEZ	Ukupno	
		17,00%	12,5%	1,5%	31,00%	6,00%	4,00%	0,50%	10,50%	
1.	590,00	100,30	73,75	8,85	182,90	35,40	23,60	2,95	61,95	244,85
2.	1.000,00	170,00	125,00	15,00	310,00	60,00	40,00	5,00	105,00	415,00
3.	410,00	69,70	51,25	6,15	127,10	24,60	16,40	2,05	43,05	170,15

Porezni obveznik će u izvještaju MIP-1023 i specifikacijama 2002/2002-A prikazati ukupno obračunate plaće ili osnovice za obračun doprinosa kako je na primjer prikazano u rednom broju 2 u tabeli iznad.

Poreznom obvezniku koji po dostavljenom zahtjevu ne ispunjava uslove za dobivanje subvencije nadležna ispostava će dostaviti Rješenje o odbijanju zahtjeva.

Uplatu sredstava na ime subvencije obaveznih doprinosa izvršit će Federalno ministarstvo finansija – financija direktnom uplatom fondovima na propisane uplatne račune javnih prihoda. Po izvršenoj uplati od strane Federalnog ministarstva finansija – financija navedene uplate će se proknjižiti na finansijske kartice poreznih obveznika prema vrsti prihoda u skladu sa dostavljenim zahtjevom za subvencioniranje i uplaćenim sredstvima.

Spisak poreznih obveznika kojima je odobrena i od strane Federalnog ministarstva finansija - financija uplaćena subvencija doprinosa, Porezna uprava Federacije će objaviti na svojoj web stranici shodno Zaključku Vlade broj V.565/20 od 23.04.2020.godine.

Broj: 13/01-02-1-749/20
Sarajevo, 13.05.2020. godine



V.D. DIREKTOR

Mr.sc. Serif Isović

M.P.